

1981

13.1.81

En pia memoria da

## Maria Sabina Monn-Venzin, Rueras/ Domat



Ils davos dus meins digl onn vargau ha igl aunghel dalla mort fatg ina gronda largia en nossa cumionza. Aschia annunzia il zenn da s. Vigeli als parochians da Sedrun e Rueras la mort da nossa buna convischina Maria Sabina Monn, naschida Venzin. Ella ha contonschii la aulta vegliadetgna da 87 onns.

Vulein nus descriver in tec il cuors da sia veta, stuein nus turnar a Selva/Tujetsch. Leu han ins mess quei affonnet en tgina ils 26 d'october 1893, e quei sco emprem affon dils buns geniturs Giusep e Flurin e Sabina Venzin, naschida Simonet. Ella ha survegnui il bi num: Maria Sabina. Culs

onns ein aunc sis auters fargliuns vegni vitier. Dus da quels, Giachen Martin e Dora, ein aunc en veta. Maria Sabina ei carschida si en quei bi menaschi puril dils geniturs, en ralziuns fetg semplas, nua ch'ei tuccava bunamein da luvrar d'in'alva a l'autra. Ins sefidava da quel sisura. Tut ei vargau (forsa cun pli gronda cuntentantscha che ozildi).

1921 tonscha Maria Sabina il maun al giuven da Rueras, Gion Antoni Monn, staus adina enconuschents sco fravipign. Quella lètg ei vegnida benedida cun siat affons: quater buobas e treis buobs, stai adina la legria dils buns geniturs. Ins fageva il pur. Il consort fuva era in bien e passiunau catschadur. Alla catscha eis el staus fideivels entochen ell'aulta vegliadetgna. Cun oraziun, tema da Diu e cuntents cul pauc ch'ins veva lezs onns, han quels buns geniturs tratg si lur affons. Adina han els fatg bien cun els.

Las cruschs han era buca muncau a quella buna mumma. Ella ei denton seremessa alla veglia dil Segner, surmuntond aschia tut. E malgrad tutta truscha en famiglia ha ella adina giu temps e peda per in survetsch al concarstgaun. Il pli bi da sia veta ei segir stau la dumengia dil sogn Scapulier 1947. Quei di ha ella saviu assister - cun consort ed affons - alla messa nuviala dil fegl vegl, sur Callist Monn. Tut fretgs dalla lavur ed oraziun d'ina mumma pietusa. 1970 ha la defuncta piars il carezau consort e quei entras in accident buca lunschnaven da sia casa.

Ils affons ein i cul temps tuts navan. Igl ei vegniu vit en casa. Cheu sedecida ella - era sin giavisch da ses affons - da serender a Domat tier siu fegl Flurin che steva leu. Lez, sia consorta e ses affons, han fatg bien cun la mumma e tatta. Ei seigi engraziau persuenter. Ils auters affons visitavan la cara e buna mumma. Sonda, ils 27 da december 1980 celebrescha siu fegl la sontga messa en stanza dalla mumma. Lezza retscheiva - sco adina - Niessegner. Tgei gronda grazia. Ils 29 da december va sia veta a fin sco la glisch d'ina cazzola avon ch'il di prendi si'entschatta. Ella ei vivida en tutta tgeuadad ed ha aschia era astgau restituir sia olma pleina da merets per la perpetnadad al tutpus-sent e perpeten Diu.

Ils 31 da december, il davos di digl onn 1980, eis ella vegnida surdada alla tiara benedida. El bi riug da bara, salvaus da nies bien sur Benedetg Baselgia, plevon a Rueras, ei vegniu seregurdau dalla defuncta. Ad el seigi engraziau persuenter. Vischins e vischinas da lunsch e da maneivel, han buca schau per la breigia da cumpignar la defuncta alla fossa. Cun la preziada defuncta Maria Sabina ei ina gronda personalitat da format ida vi ella perpetnadad. Vegli il Segner remunerar las bunas ovras e dar all'olma dalla defuncta il meritau ruaus perpeten. Als cars, restai anavos, condolein nus da cor. Segner, lai scclarir a tut nos cars defuncts la glisch perpetna. RIP

G.F.